

## Ouw gebroeke (slot)

Es kind móste veer vreuger bie 't opstaon en slaope gaon e krutske make mit wiewater, um zoa Gods zaegte te vraoge vuèr d'r nuje daag of de nach. En kaome veer langs e krutske aan 'ne baom, op 'ne krusing van waeg, in ge veld, of langs 'n kirk, altied makde veer oos e krutsteike. En dagelijks zus te op d'r televisie voetballers te pas en te onpas krutskes maken, terwiel ze vermoedelijk neet nadinke wat dat beteikent, mèh umdat 't e gebroek is bie hun heim.

En makde d'r pap of mam vreuger neet e groot kruts mit 't braodmets uèver 't braod, veurdát 't aangesneje waort.

En ouch 't bae veur en nao 't aete is wie langer wie miè in unbroek geraakt.

Wie ich al dèkker gesjraeve hób, trok e buurjungske va e jaor of drij zich 'ne kaetel koakend water van de fornuis uèver zich en waor gans verbrand. Miene ouwste broor dae dao aan 't kaarte waor, góng direk nao 't Mien Rameckers op Dolberg en dat baejde zich doa get en nao 't make van e krutstaeke góng mie broor weer truk en zoog dat dat kind neet miè sjraefde van de pien, óndanks die graote blaore uèver zien ganse hoed.

Wie d'r dokter nao e tedsje kaom en zoog dat 't kind gein pien houw, zag hae: " 't is neet te geluive, zoa verbrand en da gein pien hóbbe, geer zeet h'm zeker bie 't Mien op Dolberg gaon laote zaegene.

Dit is gebeurd rónnd 1934.

En nog neet zao lang geleje , ich mein in 1985, waor 'ne man get aan 't lasje ónger eine aoto en doe vloog de bezienleiding in de fik en verbrand hae zie gezich, de heng en al zien haore. Hae waort nao 't ziekenhoes gebrach en houw allemaol derde graads brandwónde, dus hièl vääol pien. Dat hób ich zelf gezeen. Dat waor afsjuwelek, wie dae oetzoog. Dae kreppeerde kómpleet van de pièn, mèh wie zie broor dae ouch zaegende, dao gewaes waor en gebaejd houw, waor de pien ouch weg.

E paar jaor geleje houw miene kleinzoan ein vrattel tössje de tiène en kós bienao neet miè loape van de pien. Die waor zoa groot dat d'r hoedokter en ouch hoedspecialist d'r niks aan wólle doon en dus waort 'n aafspraak gemakt in 't ziekenhoes. Die vrat mós ónger narcose weggehaold waere en dat zouw vièrtièn daag later gebuère.

Ich stjèlde veur um ze te late zaegene of wegbaeje wie me dat zaet. Mit goodvinge van ziene pap, dae dao neet in geluifde, góng ich nao d'r Frans

Bemelmans en dae baejde zich e paar weesgegroetjes en nog get, vreef effe mit e stök appel uèver dae tièn en zag: "Gaot mèr nao heim, ich sjtaek dae appel in gen aerd en es dae verrot is da vilt die vrat vanzelf droet. En werkelijk, nao 'n week zaogèt, kaom d'r jong op `ne mörrige mit de vrattel in de heng en kós hae d'r pink in 't loak va ziene tièn lègke, zao graot waor dat. En hae hoofde neet nao 't ziekenhoes te gaon.

Geluve aan zaegene of is 't allemaol toeval.  
Mèh dat 't allemaol toeval is, geluif ich neet.

Ichzelf bin ouch al dèkker mich gaon laote zaegene, mèh baat hōb ich neet gehad. Persuènlich ving ich dat ederein vuèr mich kan baeje, mèh dao mó't 't bie blieve. Dae hokes pokes va "vief maal d'r mond sjeule of weit ich wat, hoof vuèr mich neet. Mèh mesjien waer ich daorum neet gehólpe.

Es vreuger e perd "de Sjlèk" houw of 'n koew "euer pãötje" waor, da waor d'r allich eine boer in de buurt dae dat zaegendde en da genoos dat deer.

Es de luuj vreuger tandpien houwe góngge ze nao Ma Caenen op Klumme, die kós dat zaegene en ouch kourts doog die wegbaeje.

En hie in Sjin waor 't Sjengske Bertram, eine sjoarman, dae hat, ich zou zegke duzende luuj gezaegend en vãöl luuj zint door h'm zoa gehólpe. Noe daet zien dochter Mevr. G. Pasmans datzelfde en ouch zie hat dageliks luuj mit diverse klachte en probleme en vãöl van die luuj veule zich baeter es zie vuèr hun gebaed hat en door heur gezaegend zint. Woaste ouch gaes, doe zuls altied ouch zelf mótte baeje. En dat numme ze nog altied "de Boote" doen. Meistal zint dat vief Ooze Vaders en Weesgegroetjes en Ere zij de Vader. Dat mòs me neuge daag baeje en d'r zóndig telde neet mit. Mèh dat kint natuurlijk ouch 'ne anger gebedje zeen. En jederein dae zaegent hat ouch 'ne bepaalde heilige, zoawie "de Mooder Gods, d'r H. Antonius, Pater Pio, Onze Lieve Vrouw va Lourdes of Fatima en neum mèr op.

Al deez gebroeke hōbbe te make mit zaegene en laote zaegene en "Doe kins aan dat zaegene geluve os neet, doe kins dinke, 't is verbeelding of 't zit tōssje de oare, en doe kins zegke, dat waor vreuger zao, mèh es de luuj huu nog in de rats zitte, goont ze toch mèr, al is 't stiekem, nao zoane gebeds genaezer." of snappe zich vas aan ein van die anger ouw gebroeke.

Dré Kickken